

Na osnovu člana 24. stava 4. Zakona o zaštiti stanovništva od zaraznih bolesti ("Službene novine Federacije BiH", broj 29/05), federalni ministar zdravstva donosi

## **PRAVILNIK**

### **O USLOVIMA U POGLEDU STRUČNE SPREME ZAPOSLENIKA, TEHNIČKE OPREMLJENOSTI, PROSTORIJA I DRUGIH USLOVA KOJIMA MORAJU UDOVOLJAVATI ZDRAVSTVENE USTANOVE, PRIVREDNA DRUŠTVA ODNOSNO FIZIČKE OSOBE - OBRTRNICI ZA OBAVLJANJE DEZINFEKCIJE, DEZINSEKCIJE I DERATIZACIJE**

#### **I. OSNOVNE ODREDBE**

##### **Član 1.**

Ovim Pravilnikom utvrđuju se uslovi u pogledu stručne spreme zaposlenika, tehničke opremljenosti, prostorija i drugih uslova kojima moraju udovoljavati zdravstvene ustanove, privredna društva odnosno fizičke osobe - obrtnici za obavljanje dezinfekcije, dezinsekcije i deratizacije kao opće mjere za sprečavanje i suzbijanje zaraznih bolesti (u daljnjem tekstu: preventivna DDD).

Odredbama ovog Pravilnika propisuju se i uslovi u pogledu stručne spreme zaposlenika, tehničke opremljenosti, prostorija i drugih uslova kojima moraju udovoljavati zdravstvene ustanove koje obavljaju protuepidemijsku dezinfekciju, dezinsekciju i deratizaciju, kao mjeru za suzbijanje širenja zaraznih bolesti (u daljnjem tekstu: protuepidemijska DDD).

#### **II. PREVENTIVNA DEZINFEKCIJA, DEZINSEKCIJA I DERATIZACIJA**

##### **Član 2.**

Preventivnu DDD mogu obavljati zdravstvene ustanove, privredna društva odnosno fizičke osobe - obrtnici (u daljnjem tekstu: pravne i fizičke osobe) ako za obavljanje te djelatnosti imaju odobrenje federalnog ministra zdravstva.

Odobrenje za obavljanje preventivne DDD koje uključuje upotrebu otrova I grupe daje se pravnim i fizičkim osobama iz stava 1. ovog člana na vrijeme od tri godine.

Odobrenje za obavljanje preventivne DDD koje uključuje upotrebu otrova iz II i III grupe daje se pravnim i fizičkim osobama iz stava 1. ovoga člana na vrijeme od pet godina.

Rokovi iz st. 2.i 3. ovoga člana teku od dana izdavanja odobrenja iz stava 1. ovog člana.

Otrovi I, II i III grupe dati su u listi koja je sastavni dio ovog Pravilnika.

##### **Član 3.**

Ako nadležna sanitarna inspekcija u okviru svojih ovlaštenja utvrdi da pravne i fizičke osobe, ne obavljaju mjeru dezinfekcije, dezinsekcije i deratizacije u skladu s

dobivenim odobrenjem, odobrenje za obavljanje preventivne DDD oduzet će se i prije roka iz stava 2. i 3. člana 2. ovog Pravilnika.

Odobrenje, na osnovu pismenog izvještaja sanitarne inspekcije oduzima federalni ministar zdravstva.

#### Član 4.

Pravne i fizičke osobe iz stava 2. člana 2. ovog Pravilnika moraju zapošljavati u radnom odnosu s punim radnim vremenom:

- jednog doktora medicine,
- jednog dipl.sanitarnog inženjera,
- tri sanitarna tehničara.

#### Član 5.

Pravne i fizičke osobe iz stava 2. člana 2. ovog Pravilnika moraju imati najmanje sljedeće:

##### **1. opremu za rad:**

- dva topla zamagljivača kapaciteta pet litara,
- dva uređaja za hladno orošavanje - generator aerosola,
- četiri ledne motorne prskalice s dodacima za zaprašivanje i granuliranje,
- četiri tlačne prskalice kapaciteta pet litara atestirane na pritisak od tri bara,
- hladnjak,
- otvarači za HCN,
- opremu za hloriranje vode,
- komparator.

##### **2. zaštitnu opremu:**

- izolacijska aparata,
- najmanje jedna zaštitna plinska maska po zaposelniku,
- filtere za maske za organske plinove, cijanovodik te sve plinove koji se nalaze u skladištu ili se koriste u radu,
- uređaj za detekciju plinova sa dovoljnim brojem odgovarajućih indikatorskih cjevčica za cijanovodik, metilbromid te sve ostale plinove koji se koriste u radu,
- najmanje pet polumaski s filterima za zaštitu od organskih para i čestica,
- za svaku samostalnu ekipu komplet prve pomoći s antidotima za sve otrove s kojima se radi kao i osnovnim simptomatskim lijekovima, tlakomjerom, stetoskopom te uputom za primjenu prve i medicinske pomoći u slučaju otrovanja,
- uređaj za primjenu kisika kroz najmanje 30 minuta, te gumene čizme, gumene rukavice, zaštitni kombinezon, zaštitne naočale i pokrivalo za glavu za sve zaposlenike.

#### Član 6.

Pravne i fizičke osobe iz stava 2. člana 2. ovog Pravilnika moraju imati vlastiti skladišni prostor usklađen sa propisom koji regulira promet otrova te:

- prostoriju za skladištenje otrova površine najmanje 20 m<sup>2</sup>,
- prostoriju za čuvanje tehničke opreme i aparata za primjenu, površine najmanje 16 m<sup>2</sup>,
- prostoriju za čuvanje zaštitne opreme, površine najmanje 12 m<sup>2</sup>,
- prostoriju za administrativno osoblje, površine najmanje 10 m<sup>2</sup>,
- poseban sanitarni čvor s tuš kabinom.

#### Član 7.

Pravne i fizičke osobe iz stava 3. člana 2. ovog Pravilnika moraju zapošljavati u radnom odnosu s punim radnim vremenom:

- jednog doktora medicine ili diplomiranog sanitarnog inženjera ili diplomiranog inženjera biologije, te
- dva sanitarna tehničara.

#### Član 8.

Pravne i fizičke osobe iz stava 3. člana 2. ovog Pravilnika moraju imati najmanje sljedeće:

##### **1. opremu za rad:**

- jedan topli zamagljivač kapaciteta pet litara,
- dvije leđne motorne prskalice s dodacima za zaprašivanje i granuliranje,
- jedan aparat za hladno orošavanje - generator aerosola,
- dvije tlačne prskalice kapaciteta pet litara atestirane na pritisak od tri bara.

##### **2. zaštitnu opremu za svaku samostalnu terensku ekipu prema vrsti posla koji obavlja:**

- najmanje tri maske s filterima za zaštitu od organskih para i čestica,
- najmanje tri polumaske s filterima za prašiva i aerosole,
- komplet prve pomoći s antidotima za sve otrove s kojima se radi, kao osnovnim simptomatskim lijekovima, tlakomjerom i stetoskopom te uputom za primjenu prve i medicinske pomoći u slučaju otrovanja, te gumene čizme, gumene rukavice, zaštitni kombinezon, zaštitne naočale, pokrivalo za glavu za sve zaposlenike.

#### Član 9.

Pravne i fizičke osobe iz stava 3. člana 2. ovog Pravilnika moraju imati skladišni prostor usklađen sa Zakonom o prometu otrova te prostorije za:

- skladištenje otrova II grupe
- čuvanje tehničke opreme, aparata za primjenu i ormara za zaštitnu opremu,
- administrativno osoblje,
- poseban sanitarni čvor s tuš kabinom.

### **III. OBAVEZNA PROTUEPIDEMIJSKA DEZINFEKCIJA, DEZINSEKCIJA I DERATIZACIJA**

#### Član 10.

Zdravstvene ustanove koje obavljaju djelatnost obavezne protuepidemijske DDD moraju zapošljavati u radnom odnosu na neodređeno vrijeme s punim radnim vremenom doktora medicine specijalistu epidemiologije.

U pogledu tehničke opremljenosti i prostorija zdravstvene ustanove iz stava 1. ovog člana moraju udovoljavati uslovima iz čl. 5., 6., 8. i 9. ovog Pravilnika.

#### IV. DEZINFEKCIJA, DEZINSEKCIJA I DERATIZACIJA

##### Član 11.

Za zaposlenike koji obavljaju poslove dezinfekcije, dezinsekcije i deratizacije obavezan je zdravstveni pregled prije početka i tokom obavljanja tih poslova u skladu sa propisima o zaštiti na radu.

##### Član 12.

Neposredni izvršioци obavezne preventivne DDD iz stava 1. člana 2. obavezni su svakih pet godina pohađati i završiti tečaj iz dezinfekcije, dezinsekcije i deratizacije i asanacije koji provodi Zavod za javno zdravstvo Federacije Bosne i Hercegovine prema određenom programu odobrenom od federalnog ministra zdravstva.

##### Član 13.

Pravna i fizička osoba koja obavlja djelatnost dezinfekcije, dezinsekcije i deratizacije mora imati iskaznicu, izrađenu od tvrdog papira, dimenzija 105 x 70 mm, prema obrascu koji je sastavni dio ovog Pravilnika (obrazac broj 1).

Iskaznica osobe kojoj je odobrena upotreba otrova I, II i III grupe označena je crvenom bojom, a iskaznica kojom je odobrena upotreba otrova II i III grupe označena je zelenom bojom.

#### V. EVIDENCIJE

##### Član 14.

Pravne i fizičke osobe iz stava 2. člana 2. ovog Pravilnika obavezne su o obavljenoj dezinfekciji, dezinsekciji i deratizaciji voditi evidenciju.

Evidencija se vodi na evidencijskim karticama, prema obrascu koji je sastavni dio ovoga Pravilnika (obrazac broj 2).

##### Član 15.

Pravne i fizičke osobe koje obavljaju dezinfekciju, dezinsekciju i deratizaciju obavezne su polugodišnje pismeno izvještavati nadležan zavod za javno zdravstvo kantona o obavljenim mjerama dezinfekcije, dezinsekcije i deratizacije, te o vrstama i količinama utrošenih sredstava za dezinfekciju, dezinsekciju i deratizaciju.

Zavod za javno zdravstvo kantona o izvještaju iz stava 1. ovog člana podnosi izvještaj Zavodu za javno zdravstvo Federacije Bosne i Hercegovine koji o prednjem godišnjem izvještava federalnu sanitarnu inspekciju.

#### VI. PRIJELAZNE I ZAVRŠNE ODREDBE

##### Član 16.

Pravne i fizičke osobe koje obavljaju dezinfekciju, dezinsekciju i deratizaciju, obavezne su se uskladiti s odredbama ovog Pravilnika najkasnije u roku 90 dana od dana stupanja na snagu ovog Pravilnika.

##### Član 17.

Danom stupanja na snagu ovog Pravilnika prestaje primjena propisa kojima se na teritoriji Federacije Bosne i Hercegovine uređivalo, do dana stupanja na snagu ovog Pravilnika, obavljanje dezinfekcije, dezinsekcije i deratizacije.

##### Član 18.

Ovaj Pravilnik stupa na snagu osmoga dana od dana objavljivanja u "Službenim novinama Federacije BiH".

Ministar  
prim. dr. **Vjekoslav Mandić**, s. r.

Na osnovu člana 24. stav 4. Zakona o zaštiti stanovništva od zaraznih bolesti ("Službene novine Federacije BiH", broj 29/05), federalni ministar zdravstva donosi

## **PRAVILNIK**

### **O DOPUNAMA PRAVILNIKA O UVJETIMA U POGLEDU STRUČNE SPREME UPOSLENIKA, TEHNIČKE OPREMLJENOSTI, PROSTORIJA I DRUGIH UVJETA KOJIMA MORAJU UDOVOLJAVATI ZDRAVSTVENE USTANOVE, PRIVREDNA DRUŠTVA ODNOSNO FIZIČKA LICA - OBRTNICI ZA OBAVLJANJE DEZINFEKCIJE, DEZINSEKCIJE I DERATIZACIJE**

#### Član 1.

U Pravilniku o uvjetima u pogledu stručne spreme uposlenika, tehničke opremljenosti, prostorija i drugih uvjeta kojima moraju udovoljavati zdravstvene ustanove, privredna društva odnosno fizička lica - obrtnici za obavljanje dezinfekcije, dezinfekcije i deratizacije ("Službene novine Federacije BiH", broj 60/06) (u daljnjem tekstu: Pravilnik), u članu 7., u alineji 1, iza riječi "biologije", dodaju se riječi: "ili doktora veterinarske medicine,".

#### Član 2.

U članu 8, iza alineje 4 dodaje se nova alineja 5, koja glasi:

"- najmanje jedno specijalizovano namjensko vozilo za prevoz otrova."

#### Član 3.

Iza člana 9, dodaje se novi član 9a, koji glasi:

#### "Član 9a.

Ispunjenje uvjeta iz čl. 4, 5, 6, 7. i 8. Pravilnika, utvrđuje stručna komisija koju imenuje federalni ministar zdravstva.

Troškove rada stručne komisije iz stava 1. ovog člana, snosi podnosilac zahtjeva za obavljanje dezinfekcije, dezinfekcije i deratizacije.

Federalni ministar zdravstva posebnim rješenjem propisuje visinu i način plaćanja troškova ostvarenih na ime naknade za rad stručne komisije iz stava 1. ovog člana."

#### Član 4.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

---

Broj 01-37-2232/06  
18. decembra 2006. godine  
Sarajevo

---

Ministar  
prim. dr. **Vjekoslav Mandić**, s. r.